

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

- जम्मू कश्मीर च विधानसभा चुनां लेई प्रचार जोरें शोरें जारी, प्रधानमंत्री नरेन्द्र मोदी होर अज्ज डोडा च इक चुनां रैली गी संबोधत करगंन।
- चुनाएं दे त्रीए ते खीरी गेड़ लेई दाखल नामजदगिएं दी कल जांच कीती गई। 449 मेदवारें दे कागज पत्र सेही पाए गे।
- किश्तवाड़ दे छात्रू च छिड़े दे इक टाकरे च दऊं सैनिक शहीद, 2 जख्मी।
- चीन च खेड्डी जा'रदी मर्दे दी एशियन चैंपियन ट्रॉफी दे इक मकाबले च अज्ज भारत ते पाकिस्तान दियां टीमां आमने सामने होंगन।

<><><><><><>

PM-Doda Rally

जम्मू कश्मीर विधानसभा चुनां दे पैहले गेड़ तैहूत 18 सितम्बर गी 24 सीटें पर होने आले पैहले गेड़ दे मतदान लेइ चुनां प्रचार जोरें शोरें जारी ऐ। सब्बै पार्टियां जिंदे च राश्ट्री ते प्रदेश सतह दियां पार्टियां बी ऐन, मतदाताएं गी अपने पक्खै च करने लेई अपनी पूरी टिल्ल ला करदियां न। बीजेपी दे वरिष्ठ लीडर प्रधानमंत्री नरेन्द्र मोदी होर अज्ज डोडा च इक चुनां रैली गी संबोधत करगंन, जित्थें बीजेपी 8एं सीटें पर चुनां लड़ै करदी ऐ। आकाशवाणी दे जम्मू संवाददाता नै जानकारी दित्ती ऐ जे नरेन्द्र मोदी होर 19 सितम्बर गी रीनगर च ते श्री वैष्णो देवी कटरा ते 26 सितम्बर गी जम्मू ते कदुआ जिलें च रैलिएं गी संबोधत करगंन। केन्द्री गृहमंत्री अमित शाह होर 16 सितम्बर गी किश्तवाड़ ते पाडुसर-नागसैनी हल्के च प्रचार करगंन। गजा सिंह राणा, शक्ति परिहार ते दीलीप परिहार डोडा दिएं त्रै सीट पर बीजेपी दे मेदवार न जिसलै जे सुनील शर्मा, शगुन परिहार ते तारिक कीन किश्तवाड़ दिएं त्रऊं विधानसभा सीटें परा चुनां लड़ा करदे न। कांग्रेस ते नैशनल कांफ्रेंस च बी अपने पार्टी मेदवारें दे हक्कै च रज्जियै प्रचार करा करदे न।

<><><><><><>

Scrutiny Phase-3

जम्मू कश्मीर विधानसभा चुनावों के त्रिए ते खीरी गेड़ तैहत् 40 विधानसभा सीटें पर होने आले चुनावों लेई 449 मेदवारें दे नामांकन वैद्य-जायज पाए गे न। आकाशवाणी दे जम्मू संवाददाता नै जानकारी दितती ऐ जे 486 मेदवारें आस्सेआ दाखल कुल 518 नामजदगिएं दी कल शुक्रवारें जांच कीती गेई जेहूदे बाद जम्मू जिले च 112, बारामुला जिले च 107, कुपवाड़ा च 75, बांडीपोरा च 46, कठुआ ते उधमपुर जिलें च 38-38 ते सांबा जिले च 22 मेदवारें दे नामांकन जायज पाए गे। जम्मू प्रांतै च उधमपुर जिले दे 4 विधानसभा हल्के चा, उधमपुर वेस्ट व 13, उधमपुर ईस्ट च 9 ते रामनगर विधानसभा हल्के च 7 मेदवारें दे नां जायज पाए गे। तोआई कठुआ जिले च बनी विधानसभा सीट पर 9, बिलावर सीट पर 4, बसोहली च 5, जस्रोटा च 7, कठुआ च 5 ते हीरानगर विधानसभा हल्के च 6 मेदवारें दे नामांकन मंजूर कीते गे। इस्सै चाल्ली सांबा जिले च रामगढ़ सीट पर 7, सांबा च 14 ते विजयपुर असेंबली सीट पर 11 मेदवारें दे नामांकन जायज पाए गे। जिसलै जे जम्मू जिले दिएं 11एं विधानसभा सीटें चा बिश्नाह सीट पर 11, सुचेतगढ़ च 13, आर.एस.पुरा जम्मू साउथ च 14, बाहु सीट पर 12, जम्मू ईस्ट च 9, नगरोटा च 8, जम्मू वेस्ट च 12, जम्मू नार्थ च 17, मढ़ च 6, अखनूर च 3 ते छम्ब असेंबली हल्के च 8 मेदवारें दे नामांकन जायज पाए गे। मेदवार जेकर चाह्न तां 17 सितम्बर तोड़ी अपने नामांकन परताई बी सकदे न।

<><><><><><>

BJP-J&K

केन्द्री मंत्री जी.किशन रेड्डी जेहूडे जे विधानसभा चुनावों लेई जम्मू कश्मीर दे चुनावों प्रभारी न, होरें आखेआ ऐ जे प्रधानमंत्री नरेन्द्र मोदी हुंदे नेतृत्व तैहत् जम्मू कश्मीर च बड़ा मता बदलाव आया ऐ ते इस प्रदेश गी इक समें च आतंकवाद दा गढ़ आखेआ जंदा हा, अज्ज ओहूदी पंछान सैलसफा दे इक महत्वपूर्ण केन्द्र दे रूपै च बनी दी ऐ। कल सांबा च इक रैली गी संबोधत करदे होई उनें आखेआ जे पार्टी दी जम्मू कश्मीर लेई सोच ते नजरिया डॉ. श्यामा प्रसाद मुखर्जी हुंदे एक निशान, एक विधान, एक प्रधान आले नजरियै दा प्रतीक ऐ। उनें आखेआ जे बीजेपी नै शुरू थमां गै दफा 370 दा विरोध कीता ऐ ते प्रधानमंत्री हुंदी नेतृत्व च इसी खत्म करियै जम्मू कश्मीर च रमानदारी, तरक्की ते खुशहाली दी इक नमीं लैहर आंदी गेदी ऐ।

<><><><><><>

NC-370

नैशनल कांफ्रेंस दे अध्यक्ष साबका मुख्मन्त्री डॉ. फारुक अब्दुल्ला होरें इंजिनियर रशीद गी इक एजेंट करार दिंदे होई आखेआ जे नैशनल कांफ्रेंस गी कदें दरकनार नेई कीता जाई सकदा भाएं हर कुसै गी जेल थमां रिहा कीह नेई करी दित्ता जा। आकाशवाणी दे जम्मू संवाददाता नै जानकारी दित्ती ऐ जे कल शोपिया च इक जनसभा गी संबोधत करने परेंत डॉ. अब्दुल्ला होरें आखेआ जे नैशनल कांफ्रेंस कुसै कोला डरदी नेई ऐ उसी लोकें पर पूरा भरोसा ऐं अमित शाह हुंदे आस्सेआ एह आक्खे जाने पर जे दफा 370 गी कदें ब्हाल नेई होन दित्ता जाग, एहदे बारे पुच्छे गेदे सुआल दे परते च उनें आखेआ जे दफा 370 जम्मू कश्मीर दे लोकें दे दिलै दी धड़कन ऐ जिसी नैशनल कांफ्रेंस परतियै ब्हाल करोग।

<><><><><><>

Hindi Diwas

अज्ज पूरे देश च हिंदी दिवस मनाया जा'रदा ऐ। अज्ज दे दिन 1949 च संविधान सभा नै देवनागरी लिपि च लिखी दी हिंदी गी देश दी अधिकारिक भाषा दे रूपे च अपनाया हा। अज्ज हिंदी विश्व च सब्बने शा मती बोली जाने आली भाषा ऐ ते 520 मिलियन शा बी मते लोकें दी पैहली भाषा ऐ। अज्ज इस मौके उप्पर गृहमन्त्री अमित शाह होर नमीं दिल्ली च हिंदी भाषा दी हीरक जयंति समारोह गी ते चौथे अखिल भारतीय राजभाषा सम्मेलन गी संबोधत करगंन।

<><><><><><>

J&K Encounter

2 सैन्य कर्मिं किश्तवाड़ जिले दे छात्रू इलाके च कल आतंकवादिं कन्नै होए दे टाकरे च अपनी जान गोआई, नै 2 दुए घायल होई गे। आकाशवाणी संवाददाता नै दस्सेआ जे नादधाम दे उप्परले जंगली इलाकें, पिंगनाल दुगाड़ा च शुरूवाती गोलाबारी दे दरान 4 सैन्य कर्मी घायल होई गे जिनेंगी तौले गै अस्पताल पजाया गेआ। इनें 4 शा 2 शहीद होई गे न ते दऊं दी हालत स्थिर दस्सी जा'रदी ऐ। शहीद होए दे सैनिकें दी पंछान नायब सुबेदार विपन कुमार ते सिपाही अरविंद सिंह दे रूपै च होइ ऐ। तोआई जीओसी व्हाइट नाइट दे सारे वरिष्ठ अधिकारिं जांबाज सैन्य कर्मिं दे बलिदान गी सलाम कीता ते उंदे परोआरें प्रति संवेदना जाहर कीती। टाकरे आले इलाके च तपाशी अभियान जारी ऐ ते मती जानकारी गी बलगेआ जा'रदा ऐ।

<><><><><><>

DRDO

रक्षा अनुसंधान ते विकास संगठन नै कामयाबी कन्नै भारती लाइट टैंक जोरावर दी शुरूआती आजमाइश कीती। महान डोगरा योद्धा जनरल जोरावर सिंह हुंदे ना आले इस हल्के टैंक दा जमीनी आजमाइश रेगिस्तान क्षेत्र च कीती गई, जिस दरान सारे लोडचदे उद्देश्य, अदभुत प्रदर्शन कन्नै पूरे करी लैते गे। भारती हल्के टैंक जोरावर गी कंबैट व्यिकल्स रिसर्च एंड डेवलपमेंट एस्टैब्लिशमेंट तरफा तैआर कीता गेआ ऐ।

<><><><><><>

Mission Yuva

मुख्य सचिव अटल डुल्लू होरें कल इक बैठक लाइयै मिशन युवा उद्यमी विकास अभियान गी यूटी च लागू करने सरबंधी नीति दी समीक्षा कीती। इस बैठक च हितधारकें हिस्सा लैता। बैठक दरान मुख्य सचिव होरें विभाग गी मिशन गी लागू करने आस्तै लोडचदे जतन करने दी सलाह दित्ती। उनें विभाग गी आखेआ जे ओ मास्टर ट्रेनरें दे दे प्रशिक्षण आस्तै हर जिले च संशोधनं ते संस्थानें दी पंछान करन। डुल्लू होरें आईईसी मुहिम चलाने आस्तै आखेआ जेहदे करी लोकें च जागरूकता पैदा होई सकै। उनें इच्छुक लोकें तोड़ी पुज्जने आस्तै सर्वेक्षण कराने आस्तै बी आखेआ। इस सत्र च विश्वविद्यालयें दे प्रतिनिधि, स्कास्ट, जेके बैंक, एसबीआई, नाबार्ड, एसआईडीबीआई दे अधिकारी मजूद हे।

<><><><><><>

Satwari

जम्मू कश्मीर यूटी सरकार नै इक पैनल बनाया ऐ जेहदी अध्यक्षता आवास ते शैहरी विकास विभाग दे प्रशासन सचिव करगंन। इस पैनल गी उनें दुकानदारें ते परोआरें दे पुनर्वास ते परतियै बसाने दे सरबंध च गुंजाइशों दी समीक्षा करने आस्तै तैआर कीता गेआ ऐ। जेहडे गै सतवारी चौक, जममू च शिड़क चौड़ी करने दे कारण प्रभावत होए न। इक आदेश मताबक 5 सदस्यीय कमेटी इनें लोकें दे पुनर्वास दे कम्में दी समीक्षा करोग ते 15 दिनें च अपनी रिपोर्ट जमा करोग। ध्यानजोग ऐ जे सतवारी दे लोक सरकार तरफा शिड़क चौड़ी करने दे कम्म दा विरोध करा'रदे न जे उंदे मताबक एहदे कन्ने उंदी रोजी रूट्टी बंद होई जाग।

<><><><><><>

Hockey

अज्ज चीन दे हुलुनवीयूर च मर्दे दी हॉकी एशियाई चैंपियन ट्रॉफी दे 5में ते खीरी पूल मैच च अज्ज भारत ते पाकिस्तान बश्कार दपैहरी सवा इक बजे मैच खेड्डेआ जाग। चार बारी दी विजेता रेई दी भारतीय टीम नै साउथ कोरिया शा सिद्दी चौथी जित्त मगरा सैमी फाइनल लेई पैहले गै कवालीफाई करी लेआ हा। हरमनप्रीत सिंह हुंदी अगुवाई च भारतीय हॉकी टीम अजे तगर इस टूर्नामेंट दे सब्बै मैच जित्तदी आई ऐ ते अंक तालिका च 12 अंक लेइयै सब्बने शा उप्पर ऐ। औंदी 16 सितम्बर गी सैमीफाइनल ते 17 सितम्बर गी फाइनल मैच खेड्डे जांगन।

<><><><><><>